

## Efesios

*Efeso llactaibi auc quiriccunama Pablo cai cartata quillcasha cachan*

<sup>1</sup> Ñaucaga Yaya Dios munacpi Jesucristo japišha camachigri nisha cachashca runa mani. Canguna Efeso llactaibi Jesucristota alita quiriccunama quillcauni.

<sup>2</sup> Ñaucanchi Yaya Diospas, Señor Jesucristohuas cangunata llaquisha mana manzharina cungailla causaita cuchun nisha tapuni.

*Jesucristohua runaguna charinagunamanda*

<sup>3</sup> Ñaucanchi Señor Jesucristohua Yayata alabashca achun. Ñaucanchi Cristohuan shuglla ashcamandami Yaya Dios jahuapachaibi tucui ali charishcagunata charinchi. <sup>4</sup> Dios chara cai pachata mana rashcallaita Cristoraicu ñucanchita japira paihuacpi jucha illac sumac causanauchun nisha. <sup>5</sup> Ñáupallata Yaya Dios ñucanchita ashcata llaquishami paihua huahuaguna tucunauchun nisha munara. Chasna munasha Jesucristo rashcamandami ñucanchita japira. <sup>6</sup> Ñaucanchi pai llaquishca churihuan shuglla tucushcamandami ñucanchita yapa llaquin. Chita yuyarisha paita alabashunchi.

<sup>7</sup> Yaya Dios yapa llaquishcamanda paihua churi talishca rahuaihuan jucha rashcagunata maillasha ñucanchita quishpichira. <sup>8</sup> Chasnallata ñucanchita yapa llaquishcamandami ñucanchima ashca yuyaita cura paita ali yachanghua.

<sup>9</sup> Chasna cusha, ñaupa pai mana yachachiushcata cunan pai munashami ñucanchita alita yachachira imasna Cristo quishpichingaraushcata.

<sup>10</sup> Chi yachachishca shimiga casna man: Cristo tucuita mandangami Dios ñaupa unai rimashcacuinta. Ñáa chi punzha pactaricpi tucuigunata mandangami, tucui jahuapachaibi causaccunatas cai pachaibi tiyaccunatahuas Cristoga tucuigunata mandac amu ashami pailla mandangaraun.

<sup>11</sup> Ñáaupa urasmanda Yaya Dios munashcamandami ñucanchita japira tucui pai charishcagunata ñucanchima cungahua ñucanchi Cristohuan shuglla tucushcamanda. Pai munashcagunataga rac anmi. <sup>12</sup> Chasna acpi Cristo israelgunata ñaupata quishpichitucuranchi tucui runaguna pai yapa yali ushac man nisha alabangahua.

<sup>13</sup> Chasnallata cangunaga mana-israelguna ashallata chi Diospa sirtu quishpina shimita uyashaga Cristota quiriranguichi. Chasna acpi Yaya Dios cangunataga ñuca quiquin runaguna acta ricunauchun nisha cachashcami pai cachangaraushca sumac Samaita ña cangunamas cachashcami. <sup>14</sup> Dios rimashcashina pai quishpichishca runagunama huasha cungaraushcata japingama paihua Samaita ñaupata cushcami sirtu quiquina cushami nisha. Chasna pai alita cuc ashcamandami tucui runaguna paita ashcata alabangaraunchi.

*Pablo quiriccunamanda Diosta pagrachu nishcamanda*

<sup>15</sup> Canguna Señor Jesucristota quirishcata uyashcani. Chasnallata canguna tucui quiric-  
cunahuan llaquinacusha ali causauncunatahuas  
uyashcani. <sup>16</sup> Chasna uyashca urasmanda  
cangunata mana cungarisha tucui uras Dioshuan  
cuintasha ñuca cangunamanda paita pagrachu  
nisha tiyauni. <sup>17</sup> Cangunamanda paituan  
cuintausha casna nisha mañauni, ñucanchi  
Señor Jesucristohua Diosmi yapa sumac acpi  
paitua Samai yachachichun canguna paita  
mas alita yachangahua nisha. <sup>18</sup> Chasnallata  
canguna mas yuyaita charinauchun nisha mañani  
canguna Diospagmada mas alita yuyarisha  
causangahua. Chasna yuyarisha causasha Yaya  
Dios cangunata japistcamandami pai cangunata  
alita rangaraushcata yachasha chapanauchun  
nisha tapuni. Maspas Dios paituagmada ashca  
yapa baliccunata pai japistca runagunama  
cungaraushcata yachanauchun nishami tapuni.  
<sup>19</sup> Maspas Jesucristota quiriccunata Dios paitua  
yapa jatun ushaihuan cangunata yanapanata  
yachanauchun nishami tapuni.

<sup>20</sup> Diosca paitua ushai yapa sinzhi ashami  
Cristota huañushcata causachira. Chasna  
causachisha juhuapachama apasha paitua  
ali maqui partima tiyachira. <sup>21</sup> Cristotaga  
tucui juhuapachais cai mundubihuas auc  
mandaccunamanda mas yali mandactami rara.  
Chasna racpi tucui gubirnugunamandas, maican  
amugunamandas, ima ushaiyuccunamandas,  
ima jatun mandaccunamandahuas mas yali  
ushaiyuctami Cristotaga rara. Chiraicumi paitua  
shutiga tucuigunamandas mas balic shuti an.

Chasna asha cunan cai mundui causaucunataga Cristo mandaunmi, chasnallata huasha punzhaibiga paillatami mandangaraun. <sup>22</sup> Cristo chasna jatun mandac tucucpi Dios tucui mundui ima tiyaccunatahuas paima cushcami tucuita mandachun nisha. Chasnallata Jesucristota churara umashina tucui quiriccunatas mandachun nisha. <sup>23</sup> Cristota quiriccunaga pahua aichacuinta maunchi. Paimi intiru partibi mandac asha paita quiriccunaibihuas jundacta causaun.

## 2

### *Dios ñucanchita llaquisha quishpichishcamanda*

<sup>1</sup> Cangunaga ñaupa Yaya Diosta mana cadsusha, juchata rasha huañushcacuinta causauranguichi. <sup>2</sup> Chi uras juchata rasha puriuranguichi cai munduibi ac mana ali munashcagunata rasha causac runa purishcacuinta. Chasna causasha supai amuhua munaita pactachiranguichi. Supai amuga cai mundui mandac ashami tucui Diosta mana uyang runagunata mandac amu an. <sup>3</sup> Chasnallata tucui ñucanchi ñaupa uras chi runagunacuelltallata causac aranchi. Ñaucanchi ima mana ali yuyarishcatas, aicha munashcatahuas rashami causac aranchi. Ñaucanchi quiquin raushcagunamandami tucui chi shuc mana alita rauc runagunacuelltallatami ñucanchitahuas Dios libachitucungaraushca aranchi.

<sup>4</sup> Chasna acpihuas Yaya Dios yapa llaquic asha ñucanchita ashcata yuyarisha yanapanmi. <sup>5</sup> Ñaucanchi juchata rashcamanda

huañushcacuinta causaranchi. Ñáucanchi chasna agllaitami Yaya Dios Cristota causachishami ñucanchitahuas paíhua causaita cura Cristohuan pariu causanauchun nisha. Pai llaquic ashcamandami cangunatas quishpichira.

**6** Jesucristotacuinctallatami ñucanchitahuas causachisha Cristohuan jahuapachaibi tiyachira ñucanchi paindi pariu mandangahua. **7** Yaya Dios alita rac ashami Jesucristomanda ñucanchita ashcata llaquishcata huiñaigama ricuchingahua chasna rara. **8** Canguna Jesucristota quirishcamandami Yaya Dios cangunata llaquisha quishpichira. Canguna mana imata ranatas ushashcamandallachu quishpichishca tucuranguichi, astahuanbas yangamanda shuc cumbiranata cushcacuintami Dios cangunata quishpichira. **9** Shuc runa pai ushashcamandalla quishpirishaga amullata alabaringa. Ama chasna alabarichun nishami Diosca canguna mana imata rashca acpihuas cangunata quishpichira. **10** Pai ñucanchita rara Jesucristo munashcacuinta aligunata rasha causachun nisha. Ñáucanchi chasna causangahuami Yaya Dios ñaupata alichira.

### *Tucui quiriccuna Cristoibi shuglla anchí*

**11** Canguna ñaupa causashcata yuyarichi. Israelgunaga ullucarapundata pitirishca ashami Diospa runaguna manchi nisha rimanaun. Canguna mana-israel runaguna asha mana pitirishca acpimi paiguna cangunataga mana Diospa runagunachanaun nishami rimaitucunguichi. **12** Ñáupa uras

canguna Cristo illac maranguichi. Chi urasca Dios japishca israel muntungunahuan pariu anata mana usharanguichichu. Dios cangunata quishpichinata munashcata mana yachashami paita mana yuyariranguichi. Quiquin Dios illac causashami pai imata paihua runagunata cungaraushcata mana yacharanguichi. <sup>13</sup> Canguna ñaupa uras Diospa mayanmanda carui augllaita Cristo paihua rahuaihuan maillashcamandami paima ña caillayashcanguichi. Chiraicumi cunanga Jesucristohuan shuglla tucushcanguichi. <sup>14</sup> Ñáupaga israelgunahuan cangunahuan chican chican causashcanguichi. Randi Cristoga shuc quinzha tapashca auta anchuchishcacuinta rasha israelgunata cangunandi shuc aillutacuinta rashca. Paiga chasna rac ashami ganas causaita tucuima cuc an. <sup>15</sup> Chasnami alichira. Pai huashami israelgunama mandashca shimigunata huinda anchuchira israelgunahuan chi mana-israelgunahuan shugllaibi auccintata paihan pariu angahua. Chasna paigonata rara pariu ganas cushi causanauchun nisha. <sup>16</sup> Cristo cruspi huashami israelgunata mana-israelgunatahuas paiguna piñanacushcata anchuchisha shugllacuina rara, chasnallata Yaya Diospas pariu causanauchun nishami alichira.

<sup>17</sup> Cristoga cai pachama shamurami ganas cushi causana shimita tucuigunama camachingahua. Ñaucanchi Diosta catic israelgunatas, chasnallata canguna mana-israelguna Diosta mana catic aucunatahuas camachira tucuiguna cushi

causaita charinauchun nisha. <sup>18</sup> Cristo chasna  
pai rashcamandami tucui ñucanchi Yaya  
Diospagma yaicunata ushanchi. Israelguna ashas  
mana-israelguna ashahuas ishcandi muntun  
paihua sumac Samaita charishcamandami  
Yaya Diospagma caillayanata ushanchi.  
<sup>19</sup> Chasna ashami canguna mana-israelguna  
ashallata cunanga mana ñaupacuinta caru  
llactamandagunachanguichi, mana pasiauc  
runacuintachanguichi, astahuanbas cunanga  
Diospa runagunahuan pariu causaucuna  
manguichi. Sirtupacha Diospa runaguna  
manguichi.

<sup>20</sup> Canguna shuc huashina manguichi.  
Jesucristoga chi huasibi punda churashca  
sinzhi istandi sapibi churashca rumishinami  
an. Pai chunga ishcái (12) punda japisha  
cachashca runagunaga, Dios rimashcata  
pasachic runagunandi shuc patacuinta  
anaura. Cangunatahuas chi jahuallaitami  
churashcashina aunguichi. <sup>21</sup> Cristo chasna  
aupimi intiru huasi shayachishca tucura Yaya  
Diospa sumac huashina pactarinagama.  
<sup>22</sup> Chasnallata cangunahuas Jesucristohuan  
shuglla tucushcamanda tucui quiric runagunandi  
Diospa sumac huasi tucuccuinta anguichi.  
Diospa Samaiga tucui paihua runaguna shungüi  
causashcamandami sirtu Diospa huasicuinta  
manguichi.

### 3

*Ñáaupa mana yachachiushca shimita Pablo  
yachachin*

<sup>1</sup> Chasna Jesucristomanda ñuca canguna mana-israel runagunata camachishcamandami carcelbi tapashca tiyauni. <sup>2</sup> Náa uyaranguichi Yaya Dios llaquisha ñucata japisthcata cangunama paihua quishpina shimita yachachichun nisha. <sup>3</sup> Diosca ñaupa mana pihuas yachaushcra actami ñucata alitami ricuchihuara. Chitami ña ashillata quillcarani. <sup>4</sup> Canguna chita ricushami mana pihuas ñaupa yachashcata cunan Cristo rashcamanda ñuca ali yachashcataga yachanata ushanguichi. <sup>5</sup> Chi ñuca yachashcaga ñaupa causac runagunama Dios mana pimahuas ricuchiushcachashca, randi cunanga ña yachashcanchimi. Jesucristo sumagyachishca runagunata yuyachira, pai punda chunga ishcrai (12) japisha camachigrichi nisha cachashca runaguna, pai rimashcata pasachiccunahuas chi ñuca yachashcataga cunanlla yachanaunmi Diospa Samai paigunata yuyachishcamanda. <sup>6</sup> Chi ñaupa mana yachaushcra acca casna man: Diospa quishpina shimidanda mana-israel runagunaga israelgunahuanmi pihua quiquin runaguna tucunaunmi, paigunahuan shuc aillu muntunlla tucushcaunami, Yaya Dios cungarauni nishcataga Jesucristota quirishcamanda mana israelgunahuas jiplinaungami.

<sup>7</sup> Yaya Dios ñucata llaquisha pihua ushaita cusha cachahuara Jesucristo quishpichigmi nisha camachingahua. <sup>8</sup> Tucui quiricccunamandas ñuca mas pishi aullaita Dios llaquisha ñucata japisha cachahuara tucui mana-israel runagunata yachachingahua, Cristo charishca mas yali aligunata yachachichun nisha cachahuara.

<sup>9</sup> Tucui imasta rac Yaya Diosca callari urasmanda  
pai cai shimita mana pimahuas rimasha charira.  
Cunanga ñucata ricuchisha cachahuashca tucui  
runagunama chi shimita yachachingahua.

<sup>10</sup> Dios casnami rara chi tucui mandac  
angelgunahuas, chi jahuapachaibi ashca ushaita  
chariucunahuas, chi mana-israelgunas quiricta  
ricusha Yaya Dios yapa ali yuyaiyuc man  
nisha rimangahua. <sup>11</sup> Callarimandapacha

Yaya Dios chasna ranata munasha ñucanchi  
Señor Jesucristota cachasha pai yuyarishcata  
pactachira. <sup>12</sup> Ñáucanchiga Jesucristota

quirishcamandami lugarta charinchi mana  
manzhasha Yaya Dioshuan cungailla cuintanata.

<sup>13</sup> Chasna acpi cangunata rimauni, ñuca  
cangunata camachishcamandami ñucata  
carcelbi churashca auni. Chasna aupihuas ama  
manzharisha saquinguichichu. Astahuanbas  
alilla aichi cangunamanda ñuca casna  
turmintarishcamanda.

### *Jesucristo ñucanchita llaquishcamanda*

<sup>14</sup> Chimandami ñuca Señor Jesucristohua Yaya  
ñaupacpi cungurisha alabani. <sup>15</sup> Diospa runaguna  
acpi tucui quiriccuna jahuapachaibi cai pachaibi  
aucunamahuas paihua shutita cura. <sup>16</sup> Chasna  
acpi Yaya Diosta mañasha tapuni pai yapa alita  
charishcamanda cangunata cuchun, canguna  
causaita pahua Samaihuan sinzhiyachina  
ushaita cuchun nisha tapuni. <sup>17</sup> Chasnallata  
Cristota quirisha catiushcamanda pai canguna  
shungüi causachun nisha tapuni. Shuc ruya  
allpa ucuma pahua angu yaicushca auccuinta

tác canguna llaquisha causanauchun nishami munani.

<sup>18</sup> Chasnallata munani cangunahuas tucui quiriccunandi caita ali yachanata imasna Cristo yapa llaquic ashcata. Pai llaquinaga mana pihuas tupuibacchan, yapa anchu, suni, jahua, ucumas. Cristohua llaquina casna acta alita yachanauchun nisha munani. <sup>19</sup> Cristohua llaquinata mana tucuita yachaibac agllaita pai ashca llaquinata canguna mas mas yachasha rinauchun nisha tapuni. Chasna tucupi Yaya Dios canguna shungüibi jundacta causanga. Canguna chasna tucuchun nisha Yaya Diosta tapuuni.

<sup>20</sup> Yaya Dios ushayuc ashcamanda ashca balichishca tucuchun. Paiga ñucanchi shungu ucuibi paihua ushaihuan ashcamandami ima munashcatas paita tapucpis yuyaricpihuas pai yalicta imatahuas ranga. <sup>21</sup> Jesucristohuacpis tucui paita quiriccunahuacpihuas huiñai huiñaigamahuas Yaya Diosta ashcata balichishca achun. Chasna achun.

## 4

### *Quiric runa asha shuglla anchi*

<sup>1</sup> Señor Jesucristo rimashcata camachiushcamaña carcelbi tiyauni. Chasna tiyaushahuas cangunata rugauni cangunata Diospa runaguna tucungahua japisthamandami pai munashcacuinta alita causana anguichi. <sup>2</sup> Mansu shungu, mana piñasha, pihuas cangunata mana alita racpihuas ahuantasha, pariumanda llaquishcahan yanapanacusha causana anguichi. <sup>3</sup> Diospa Samai ñucanchita shuc

muntunllatashina rashcami. Chasna acpi imamandahuas mana piñanacusha pariu anata yuyarina manguichi.

<sup>4</sup> Jesucristota quiriccuna asha shuc aichallashina manchi. Diospa Samaihuas shuglla man, chasnallata Dios ñucanchita japistcamandami pahuan pariu shuc ali causagringahua chapaunchi. <sup>5</sup> Jesucristo paillami amu an. Shuc quirina shimilla tiyan, bautisarinahuas shuglla tiyan. <sup>6</sup> Shuc Diosllami tiyan, paiga tucui ñucanchi yaya man. Tucuigunata mandac man. Pai ushac ashami tucuigunata yuyachin, tucui quiriccunaibihuas causaun.

*Jesucristo pahua runagunama caran tunu ranagunata cushcami*

<sup>7</sup> Tucui ñucanchi shuc muntun agllaita Cristo llaquisha pai munashca tuputa caran quiric runama caran tunu ranagunata cura. <sup>8</sup> Chimanda Diospa shimibi casna quillcashca an:  
Pai jahuapachama riusha huin huatashca runagunatacuinta pushara,  
chasnallata quiric runagunama ima tunu ali rana yuyaitas cura nin.

<sup>9</sup> Chiga imasna nishcatan. Pai jahuama riusha nishca casnami nin, Cristo jahuapachaibi causaushcamanda pai ñaupapundaga cai allpama uraicushca ara. <sup>10</sup> Chi uraicumuc Cristollatami indimanda mas yali jahuaibi rira tucui cai intiru munduibis maibihuas mandac tucungahua.

<sup>11</sup> Paimi pahua runagunata yuyaita cura pai munashcata ranauchun nisha. Maican runagunataga ñucamanda camachigrichi nisha

japisha cachara, shuccunataga pai ñuca rimashcata pasachinauchun nisha yuyaita cura, shuccunataga paihua quishpina shirimanda alita rimanauchun nisha yuyaita cusha cachara. Chasnallata maicangunataga quiriccunata cuirasha yachachichun nisha yuyaita cura. <sup>12</sup> Pai chasna cura tucui Diospa runaguna ali yuyaihuán pariu yanapanacunauchun, chasnallata Cristohua aichacuinta sinzhi tucunauchun nisha. <sup>13</sup> Diospa Churita quirisha paita mas yachasha ñucanchipura shugllacuinta tucunagama yuyaigunata cura. Chasna chi tunuta causasha huiñashcacuinta ñucanchi pariu Jesucristocuinta mas mas tucungaraunchi. Chiraicumí chi caran tunu yuyaigunata ñucanchima cushca.

*Jesucristota shuc rucucuinta mas alita catishunchi*

<sup>14</sup> Chasna tucusha cunan huahuagunacuinta mana causanachanchi caran shimitas catisha. Huahuagunallami llullautahuas mana alita rimautahuas chita catinaun alichari an nisha. Chasna rimasha pandachiccunaga chi huahuagunacuinta auc runagunata umachisha binsingauna. <sup>15</sup> Canguna randiga pariumanda ali sirtu shimita llaquishcahuán rimana anchi. Ñáucanchi causaibi mas mas Cristota catisha rina manchi paiga ñucanchi umacuinta ashcamanda. <sup>16</sup> Ñáucanchiga Cristohua aichacuinta anchi. Chi aichaibi tulluguna caran piguna cuyurinaibi llutachishcacuinta anchi. Chasna ashami caran quiric runa Dios munashcata rasha llaquinacusha tucuigunga pariumanda yanapanacusha ali sinzhi tucuna anchi.

*Cristohuan shuglla ashami mushuc causaita charinchi*

<sup>17</sup> Ñáucaga Señor Jesucristo cachashca ashami cai shimita cangunata rimasha saquiuni: Cunamanda ñaupagma Diosta mana uyac runagunacinta ama causanguichichu. Paigunaga imbidianacusha mana ali yuyaihuanzhu causanaun. <sup>18</sup> Yuyai illaccuenta causanaun. Chasna ashami Dioshuan causanatas mana yuyarinaun paiguna yuyaiga ansa tutai auccuenta ausha. <sup>19</sup> Ima tunu juchata raushahuas mana imallas pingarinaunzhu. Jiridsa mana aligunatas cushihuan rasha causaungunami.

<sup>20</sup> Cangunata randiga Cristo mana chi tunu ranata yachachirachu. <sup>21</sup> Canguna sirtutami Cristomanda yacharanguichi. Paimanda sirtu shimitas uyaranguichi. <sup>22</sup> Canguna ñaupa mana ali munaiguna cangunata umachiucuanta huaglichiun. Chi tunu causaita saquichi. <sup>23</sup> Chasna saquisha canguna shungüibi mushuc yuyaita japisha causaichi. <sup>24</sup> Shuc mushucta churarishcacuanta mushuc causaita japichi. Yaya Diosca mushuc yuyaita cushcami ñucanchi paishina yuyaita charichun nisha. Ñáucanchi chasna tucushaga mana llullasha, jucha illac, ali yuyaihuancuscaunchi.

*Mushuc causaita charisha casna purina*

<sup>25</sup> Chasna ashami tucui ñucanchi quiricpura shuc aichacuanta ashcamandami mana llullasha sirtu shimita cuintanacuna anguichi.

<sup>26</sup> Canguna ima uras maican runahuan piñanacushaga ama juchata ranguichichu.

Canguna piñarishcaga ama chishacta durachun, indi chara mana yaicugllaita uctalla alichina manguichi. <sup>27</sup> Supaita ima lugarta cuichichi cangunata umachichun chita mas yuyachingahua.

<sup>28</sup> Maican ñiaupa shuhuasha causac ashahuas cu-nanga canguna shuhuanata saquichi, astahuanbas tarabaichi. Chasna rasha cunata ushanguichi maican illaccunamas.

<sup>29</sup> Ama ima jiridsa shimigunatas rimanguichchu astahuanbas ali shimigunallata rimaichi uyaccunahuas paiguna quirinai sinzhiyanauchun, yanapashca tucunauchun.

<sup>30</sup> Diospa Samaitaga mana imamandahuas llaquichina changuichi. Yaya Dios paihua Samaita cangunata cushcamí canguna paihua runa acta yachanauchun nisha. Cangunata paihuagma apanagama pahua Samai cangunahuan aungami.

<sup>31</sup> Chasna acpi tucui mana alimanda anchurichi. Shungüibi auc jiridsa yuyaita saquichi, piñanacunatas, caminatas, jiridsa rimanatas, llullanatas, tucui ima mana aligunatahuas huinda saquichi. <sup>32</sup> Astahuanbas pariumanda alita rasha llaquinacuichi. Dios cangunata llaquisha Cristo huañushcamandami canguna juchata huiñai perdunasha anchuchira. Cangunahuas paishinallatami cangunata piñaucunahuanbas huiñai perdunasha alichinacuna anguichi.

## 5

*Diospa huahuagunaga paicuinta causanamanda*

<sup>1</sup> Cangunaga Yaya Dios llaquishca huahuaguna asha paishina ana anguichi. <sup>2</sup> Jesucristo ñucanchita llaquishami ñucanchi juchamanda huañura Diosta cushiyachingahua. Pai chasna llaquishcacuinta cangunahuas pariu llaquinacuichi.

<sup>3</sup> Canguna Diospa runaguna ashami ima mana ali rashcagunatahuas ama ranguichichu. Ashiyashcatas, ima mana alita rashcatas, shuccuna charinata munashcatahuas, quiric muntunbi chi tunugunata mana imatas yuyarinachanguichi canguna Diospac asha.

<sup>4</sup> Chasnallata ima jiridsa shimitas mana rimaichichu. Jiridsa asina shimigunas mana balinzhu, chasna acpi ama chigunata rimanguichichu. Astahuuanbas Diosta pagrachu nisha causana anguichi.

<sup>5</sup> Caitaga sirtu yachanguichimi, maican huarmita munac runaga, maican jiridsata rac runaga, shuccuna charishcagunata munasha yanga dioscunata mañac runaga, Cristo mandaushcaibi DiosAGMA pactanataga mana ushangachu, imatas mana japingachuraun.

<sup>6</sup> Chi juchata rashcagunamandami Diosta mana cadsuc runagunataga pai yapa piñasha libachinga. Canguna chasna yachasha ima pihuas yanga shimihsan cangunata umachichun chicuinta rangahua.

<sup>7</sup> Chasna acpi chi tunu rauç runagunahuan ima cumpañanguichichu.

<sup>8</sup> Ñáupaga canguna juchata raushaga ansa ucuibishina puriuranguichi. Señor Jesucristohuan shuglla tucushcamandami cunanga punzhaibi puriucuinta tucushcanguichi.

Chasna tucusha punzhaibi puriu runacinta causaichi. <sup>9</sup> Jesucristota quirisha punzhaibi puriucinta runagunaga shuccunata llaquisha yanapanau, alita ranaun, mana llullasha sirtuta rimanaun. <sup>10</sup> Chasna causasha Señor Jesucristo munashcata ranata yuyarina anguichi. <sup>11</sup> Chi mana aligunata rasha ansa ucuibicinta puriu runata ama catinguichichu. Astahuanbas canguna sumac causauta ricusha paiguna mana alita raushcata ripararinaunga. <sup>12</sup> Paiguna pacalla chasna rashcagunata cuintangahuaca pinganayacta man. <sup>13</sup> Chasna acpi tucui rashcagunata alitas mana alitahuas punzhaibi churacpiga imasna acpas ricuringami, tucui ali rashcagunaga punzhacinta ashcamanda chi mana ali rashcaguna sirtu jiridsa acta ricuchinaungami. <sup>14</sup> Punzhaga tucui imatahuas pagllai ricuchiunmi. Chimanda casna rimashca tiyanmi: Nicchari, puñuucinta aungui, huañushcashina auc jatari. Cristomi candaga can puriushcai punzhaibishinami purichinga.

*Jesucristo munashcata yachasha pactachina anchi*

<sup>15</sup> Chasna acpi alita yuyarisha causai. Ama yuyai illac runacinta purichichu, astahuanbas ali yuyaiyuc runacinta causaichi. <sup>16</sup> Cunan uras runaguna yapa juchata rasha mana alita puriunguna. Cangunaga tucui uras alita rasha causaichi. <sup>17</sup> Chasna acpi mana intindic runashina ama puringuichichu. Astahuanbas Señor Jesucristo munashcata ranata yachaichi. <sup>18</sup> Chasnallata ama machaichichu. Machanaga ñucanchi causaita

huaglichinmi. Chi Diospa Samai jundashca aichi.  
**19** Chasna asha salmosmanda tucui canguna pariumanda Diospa shirimanda yachachinacuichi alabasha cantanagunatahuas. Diospa Samai yuyachishca cantanagunatahuas. Canguna shungüi cushihuan cantasha Señor Jesucristota alabaichi.  
**20** Señor Jesucristo shutihuan Yaya Diosta imamandahuas tucui uras pagrachu ninguichi.

*Carihuan huarmihuan imasna causanamanda*

**21** Cristota manzhashcamanda pariu cangunapura yanapanacuichi. **22** Huarmiguna canguna carita cadsuna manguichi Cristota uyashcashina. **23** Cristoga pahua runagunata quishpichishcamandami paiguna umacuinta mandauc man, paita quiriccunaga pahua aichacuinta man. Chasnallata carigunaga chicuintallatami canguna huarmihua umacuinta mandauc manguichi. **24** Quiriccuna Cristota uyasha causashcacuintami huarmigunaga canguna carita tucuibí uyasha cadsuna manguichi.

**25** Cristo pahua runagunata yapa llaquisha paigunamanda huañura. Chicuintallatami cariguna, canguna huarmita llaquina anguichi. **26** Jesucristo huañura pahua runaguna Diospa shimita pactachishcamanda, bautisarishcamandahuas Diospac tucunauchun nisha. **27** Quiriccuna ima juchas, ima jiridsas, ima mana alignahuas illac tucunauchun nishami Cristo huañura paiguna pahuacpi jucha illac angahua, yapa ali, sumac tucungahua.

<sup>28</sup> Cariguna chicuintallatami canguna huarmita llaquina anguichi camba quiquin aichata cuirasha llaquiushcacuenta. Maican cari paihua huarmita llaquisha paihua quiquin auc aichatashina llaquinmi. <sup>29</sup> Yachanguichi mana pihuas paihua quiquin aichallatataga piñanzhu randi alita micushami, chimanda alita cuirarin. Cristoga chicuintallatami paita quiriccunata llaquisha cuiraunmi, carashcacuenta pai munashcata yuyachin. <sup>30</sup> Ñáucanchi pariu paihua aichacuenta ashcamandami ñucanchita alita cuiran. <sup>31</sup> Diospa shimibi chimanda casna quillcashca tiyan: Shuc cari paihua mamatas yayatas saquisha, paihua huarmihuan llutarisha paiguna ishcai chican ashallata shuc aichacuintalla tucungauna nin. <sup>32</sup> Chiga Cristo paita quiric runagunahuan shuglla tucushcamandami yachachiun. Chi yachachishcaga ñaupa uras mana intindishca aucpas cunanga intindinalla an. <sup>33</sup> Diospa shimi chasnallata nin: Caran cari paihua huarmita llaquina manguichi amu aichata llaquishcacuenta. Huarmiga paihua cari nishcata pactachina manguichi nin.

## 6

### *Huahuaguna yayagunahuan causanamanda*

<sup>1</sup> Huahuaguna, Señor Jesucristota canguna quirishcamandami yayatas mamatas uyana manguichi. Chasna cadsusha causanaga ali man. <sup>2</sup> Chimanda Dios mandashca shimiga casnami nin: Camba yayatas mamatas balichisha uyana

manguichi. Tucui mandashca shimigunamanda chi shimiga ñaupapunda cumbirana nishca an casna: <sup>3</sup> Canguna yayatas mamatas uyashcamandami cushi angaraunguichi, cai pachaibihuas unaita causangaraunguichi nishca man.

<sup>4</sup> Yayaguna, canguna huahuagunata ama yanga sinzhi shimihsan rimasha piñachichichu. Astahanbas paigunata alita huiñachisha Diospa shimita yachachisha cunaichi paiguna Jesucristota catinauchun nisha.

### *Tarabaccuna amugunahuan causanamanda*

<sup>5</sup> Amuta charic runaga camba amugunata manzhashcahuancadsuichi. Cristota manzhasha cadsushcacuintami amuhuacpi ali yuyaihuhan tarabana manguichi. <sup>6</sup> Mana paiguna ricutllai balichihuanauchun nishalla cadsuichichu astahanbas Cristohuacta rauc ashcamanda Dios munashcata tucui shunguhuan alita raichi.

<sup>7</sup> Mana runagunaraicu raucshinaga raichichu, astahanbas Señor Jesuspacta raucshina cushihuan alita raichi. <sup>8</sup> Yachanguichimi amuyucpas mana amuyucpas paiguna ima alitas rashcagunamanda Señor Jesucristo caran shucta pagashcacuinta alita cungami.

<sup>9</sup> Mandaccunahuas, chasnallata cangu-nahuacpi tarabac runagunata ali shunguhuan alita raichi. Mana yanga piñashca shimihsan rimasha manzhashinachu. Yuyarichi, cangu-natas paigunatas mandac Señor Jesucristoga jahuapachaibi tiyaunmi, paihuacpiga tucui runaguna mana chican chicanchanaun.

### *Supai urmachisha nicpihuas shayarinamanda*

<sup>10</sup> Cunanga huauquiguna, Señor Jesucristohuan shuglla ashcamanda sinzhi tucuchi, paihua sinzhi ushaihuan purichi. <sup>11</sup> Sundaluguna churarishcacuenta Dios tucui cushcagunata churarichi supai cangunata umasha urmachingahua nisha raupihuas canguna ama urmangahua. <sup>12</sup> Ñaucanchiga mana aichayuc tulluyuc runagunahuanzhu macanacunchi, astahuuanbas ushaiyuc supaigunahuanmi macanacunchi. Chi supaigunaga ima jiridsatas yuyarisha juchata raucunata mandac manaun. Huairaibi purisha mana ricuibac ashallata yapa ushaiyuc manaun. Chasna asha yapa mana aligunata rachiunguna.

<sup>13</sup> Chiraicu tucui ushaita Dios cushcagunata churarichi. Chasna churarishami supai ima uras camacpi Diospa ushaihuanga sinzhi shayarisha macanacushcacuenta mana urmasha binsinguichimi. <sup>14</sup> Chasna asha sumac tac huicsai huatarishcacuenta sirtu shimiuhuan sinzhita shayarichi. Ali ranagunallata rasha canguna shunguta jarcarichi. <sup>15</sup> Sundalu paihua chaquibi butasta churarishcacuenta cangunahuas alichirichi Jesucristota quirisha cushi causaita cunmi nishca shimita yachachingahua. <sup>16</sup> Chasnallata flechata quishpina jiru palahuan quishpishcacuenta Jesucristota mana saquisha quirina anguichi. Chasna quiric ashami flecha pundai ninayucta supai cachaushcashina mana ali yuyaigunata cachasha sinzhita quillachicpihuas cangunallata jarcarisha quishpinguichimi. <sup>17</sup> Chasnallata canguna umata cuirangahua jiru cascuta churarishcacuenta

Jesucristo ñucanchita quishpichitucushcataga yuyarina anguichi. Diospa Samai cushca espada saulita chariucuenta Diospa shimita yuyaibi charina anguichi supaita binsingahua. <sup>18</sup> Cai tucuita churarishcacuenta Diospa Samai yuyachishcahuau tucui uras Dioshuan cuintasha causaichi. Chasnallata tucui quiriccunamandas paita mañaichi.

<sup>19</sup> Chasna mañaushaga ñucamandahuas Diosta mañapaichi ñuca mana manzhasha Jesucristo quishpichishcamanda rimangahua. Pai tucuigunata quishpichigmi nishca shimiga ñaupa uras mana yachashca agllaita cunanga yachanalla man. <sup>20</sup> Chi shimita yachachingahua Dios cachashca runa ashcamandami carcelbi huatashca tiyauni. Chasna acpi Diosta mañapanguichi ñuca caibi tiyaushahuas mana manzhasha chi shimita camachingahua.

### *Dispirishca*

<sup>21</sup> Ñaucanchi llaquishca quiric huauqui Tiquicomí cai quillcata cangunahuagma apamun. Pahuas mana saquishachu Jesucristomanda camachisha ñucata yanapahuashca. Pai cangunahuacpi pactasha ñuca imasna aushcatas, ñuca raushcagunamandas rimangami canguna ali yachangahua. <sup>22</sup> Chiraicumi paita cangunama cachauni ñucanchi caibi imasna aushcatas cangunata cuintasha cushiyachingahua.

<sup>23</sup> Yaya Diospas Señor Jesucristohuas quiricunama ganas cungailla causaita cuchun, pariumanda llaquinacuna yuyaitas, mana saquisha

quirinatas cuchun nisha mañani. <sup>24</sup> Tucui Jesu-cristota huiñai llaquiu runagunata Dios llaquisha alita rachun nisha tapuni. Chasna achun.

Chillata rimani, Pablo.

**Diospa shimi  
New Testament in Quichua, Northern Pastaza  
(EC:qvz:Quichua, Northern Pastaza)**

copyright © 2009 Wycliffe Bible Translators, Inc.

Language: Quichua, Northern Pastaza

Translation by: Wycliffe Bible Translators, Inc.

Quichua, Northern Pastaza [qvz], Ecuador

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Quichua, Northern Pastaza

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

bb610827-3d94-556d-936b-ea1690b46928